



## ა ნ გ ა რ ი შ ი

ქალაქ ქუთაისის მუნიციპალიტეტის საკრებულოს საფინანსო – საბიუჯეტო  
კომისიის მიერ 2022 წლის ივლისიდან 2023 წლის ივლისამდე  
გაწეული მუშაობის შე ს ა ხ ე ბ

ქალაქ ქუთაისის მუნიციპალიტეტის საკრებულოს საფინანსო – საბიუჯეტო კომისია თავის საქმიანობას ახორციელებს საქართველოს ორგანული კანონის „ადგილობრივი თვითმმართველობის კოდექსი“ შესაბამისად, საკრებულოს რეგლამენტით, ქალაქ ქუთაისის მუნიციპალიტეტის საკრებულოს საფინანსო-საბიუჯეტო კომისიის დებულებითა და სხვა ნორმატიული აქტებით.

საკრებულოს საფინანსო-საბიუჯეტო კომისია აქტიურად არის ჩაბმული საკრებულოს სამუშაო პროცესში, მონაწილეობს საკრებულოში შემოსული პროექტების განხილვაში, ამზადებს შენიშვნებს, რეკომენდაციებს, დასკვნებს და შემდგომში მიღების მიზნით გადასცემს შესაბამის ორგანოებს.

კომისია შედგება 16 წევრისაგან.

საფინანსო-საბიუჯეტო კომისია აქტიურად იყო ჩართული ქალაქ ქუთაისის მუნიციპალიტეტის 2023 წლის ბიუჯეტის ფორმირებასა და ქუთაისის მუნიციპალიტეტის საშუალოვადიანი პრიორიტეტების დოკუმენტის განხილვაში. 2023 წლის ბიუჯეტის პარამეტრების ფორმირებისას კომისიამ სამუშაო შეხვედრებში, მერიის შესაბამის სამსახურებთან ერთად მიიღო მონაწილეობა პარამეტრების შეთანხმების პროცესში.

2023 წლის ბიუჯეტის პროექტის მეორე (საბოლოო) ვარიანტში აისახა კომისიის შენიშვნები და რეკომენდაციები, რომელიც შემუშავდა 2022 წლის ნოემბრის სხდომაზე წარმოდგენილი ბიუჯეტის პროექტის პირველი ვარიანტის განხილვისას. მიმდინარე წლის ბიუჯეტის საბოლოო ვარიანტი განხილულ იქნა 2022 წლის 23 დეკემბრის კომისიის სხდომაზე და მომზადდა შესაბამისი დასკვნა.

მუშაობის კოორდინირების მიზნით კომისიამ შეიმუშავა და დაამტკიცა 2023 წლის სამუშაო გეგმა, რომელიც გახდა კომისიის ძირითადი სამუშაო დოკუმენტი. გეგმის მიხედვით, კომისიის სხდომებზე იხილებოდა ანგარიშვალდებული ორგანოებისა და თანამდებობის პირების განვლილი პერიოდის საქმიანობა და სამომავლო პერსპექტივები.

წინასწარ ცნობილი განრიგის მიხედვით, ანგარიშვალდებული ორგანოები კომისიაში წარმოდგენენ ინფორმაციას, რომელიც განხილვის მიზნით, ეგზავნებათ კომისიის წევრებს.

საანგარიშო პერიოდის განმავლობაში, მიმდინარე მოწვევის პერიოდში, ჩატარდა საფინანსო-საბიუჯეტო კომისიის 12 (თორმეტი) სხდომა. მათზე განხილულია 42 (ორმოცდაორი) საკითხი.

ჩატარებული ყველა სხდომა იყო საჯარო.

ჩაშლილი ან გადადებული არ ყოფილა საფინანსო – საბიუჯეტო კომისიის არც ერთი სხდომა.

ყველა მათგანზე იყო მოწვეული აღმასრულებელი ორგანოს წარმომადგენლები. 2023 წლის 27 მარტის გაერთიანებულ სხდომას ასევე, ესწრებოდნენ ქალაქ ქუთაისის მუნიციპალიტეტის მერიაში პროფესიულ პრაქტიკაზე მყოფი ეკონომიკის სპეციალისტების მეოთხე კურსის სტუდენტები.

საანგარიშო პერიოდში კომისიამ იმსჯელა შემდეგ ძირითად საკითხებზე:

1. განხილულ იქნა ქალაქ ქუთაისის მუნიციპალიტეტის 2023 წლის ბიუჯეტის პროექტი და მომზადდა შესაბამისი წინადადებები და რეკომენდაციები, რომელიც მიეწოდა ქალაქ ქუთაისის მუნიციპალიტეტის მერიას;



2. განიხილა და შეაფასა 2022 წლის ბიუჯეტის შესრულების შედეგები და წარადგინა შესაბამისი წინადადებები;

3. საანგარიშო პერიოდში განხილულ იქნა ბიუჯეტის 5 ცვლილება. აქედან, 2022 წლის ბიუჯეტს შეეხო ორი (მეოთხე და მეხუთე ცვლილება), ხოლო მიმდინარე წლის ბიუჯეტს – სამი ცვლილება. ყველა ცვლილების შესახებ კომისიის მიერ მომზადდა და საკრებულოს მიეწოდა დადებითი დასკვნა;

4. განხილულ იქნა ქუთაისის მუნიციპალიტეტის 2022 წლის ინფრასტრუქტურული პროექტები, 2023 წლის ბიუჯეტში ინფრასტრუქტურული პროექტების მოცულობები და მათი მოსალოდნელი სოციალურ-ეკონომიკური ეფექტიანობა;

5. კომისიის მიერ მომზადდა და მიეწოდა საჯარო ინფორმაციები სხვადასხვა არასამთავრობო ორგანიზაციებს მათი მოთხოვნის საფუძველზე (როგორც საკრებულოს მიერ მომზადებული კრებისთი ინფორმაციის ნაწილი);

6. სოციალურ საკითხთა სამსახურის მუშაობის კომისიური განხილვის და ანალიზის შედეგად, მოსახლეობის საჭიროებების მაქსიმალურად გათვალისწინებისა და მოწყვლადი ჯგუფების გაფართოების მიზნით მომზადდა რეკომენდაციები სამედიცინო დახმარების ქვეპროგრამაში ცვლილებების შესატანად. მიმდინარე წლის 28 ივნისის საკრებულოს სხდომამ მხარი დაუჭირა ამ ცვლილებებს, რითაც მნიშვნელოვნად გაფართოვდა ამ პროგრამისადმი ჩვენი ქალაქის მოსახლეობის ხელმისაწვდომობა;

7. მოსმენილ იქნა ქუთაისის მუნიციპალიტეტის მერიის სამსახურებისა და თვითმმართველობის მიერ დაფუძნებული ორგანიზაციების ანგარიშები (ეკონომიკური განვითარების, ადგილობრივი თვითმმართველობის ქონებისა და ტრანსპორტის მართვის სამსახურის, სივრცის დაგეგმარების, ძველთა დაცვისა და სამშენებლო ნებართვების სამსახური, არასამეწარმეო (არაკომერციული) იურიდიული პირი „ქუთაისის კულტურულ, სახელოვნებო, საგანმანათლებლო დაწესებულებათა გაერთიანება“, კულტურის, სპორტის, განათლებისა და ახალგაზრდობის საქმეთა სამსახური, სოციალურ საკითხთა სამსახური, არასამეწარმეო (არაკომერციული) იურიდიული პირი „მადლიერების სახლი“, არასამეწარმეო (არაკომერციული) იურიდიული პირი „ი.ჭავჭავაძის სახელობის საჯარო ბიბლიოთეკა“, არასამეწარმეო (არაკომერციული) იურიდიული პირი „სპორტულ დაწესებულებათა გაერთიანება“, არასამეწარმეო (არაკომერციული) იურიდიული პირი „სპეციალური სერვისები“, არასამეწარმეო (არაკომერციული) იურიდიული პირი „ქუთაისის სერვისი“, არასამეწარმეო (არაკომერციული) იურიდიული პირი „ფოლკლორის ცენტრი-სიმღერისა და ცეკვის სახელმწიფო ანსამბლი“, არასამეწარმეო (არაკომერციული) იურიდიული პირი „ქალაქ ქუთაისში საზოგადოებრივი ჯანმრთელობისა და უსაფრთხო გარემოს უზრუნველყოფის ცენტრი“, შეზღუდული პასუხისმგებლობის საზოგადოება „ქუთაისის მე-4 შერეული პოლიკლინიკა“, შეზღუდული პასუხისმგებლობის საზოგადოება „რამაზ შენგელიას სახელობის სტადიონი“, შეზღუდული პასუხისმგებლობის საზოგადოება „საფეხბურთო კლუბი „მართვე“, არასამეწარმეო (არაკომერციული) იურიდიული პირი „ქუთაისის ხელბურთის კლუბი „ქუთაისი – 2015“) განვლილ/საანგარიშო პერიოდებში გაწეული მუშაობის შესახებ;

8. კომისიის სხდომაზე მოსმენილ იქნა და რეკომენდაცია მიეცა მდგრადი განვითარების მიზნების ქალაქ ქუთაისის მუნიციპალიტეტის დოკუმენტს, ასევე, ქალაქ ქუთაისის მუნიციპალიტეტის გენერალური გეგმის კონცეფციის დამტკიცებას;

9. კომისიამ მნიშვნელოვანი სამუშაოები ჩაატარა „USAID-ის“ პროგრამასთან, რომლის კოორდინირებით შემუშავების პროცესშია „ქალაქ ქუთაისის მუნიციპალიტეტის საკრებულოს საფინანსო-საბიუჯეტო კომისიის სტრატეგია და სამოქმედო გეგმა 2023 – 2025“. მოეწყო ორი შეხვედრა. კომისიამ მოამზადდა შენიშვნები და რეკომენდაციები წარმოდგენილი დოკუმენტის პროექტთან დაკავშირებით;



10. მიმდინარეობს მუშაობა და წინადადებების მომზადება ქალაქ ქუთაისის მუნიციპალიტეტის საკრებულოს საფინანსო – საბიუჯეტო კომისიის დებულებაში შესატან ცვლილებებთან დაკავშირებით;

11. კომისიამ საკრებულოს განსახილველად წარუდგინა ერთი სამართლებრივი აქტის პროექტი, რომელზეც მიღებულ იქნა შესაბამისი გადაწყვეტილება.

**საფინანსო – საბიუჯეტო კომისიის შემდეგი საანგარიშგებო პერიოდის ძირითადი პრიორიტეტებია:** 2023 წლის ბიუჯეტის შესრულების მონიტორინგთან დაკავშირებულ სამუშაოებში მაქსიმალური ჩართულობის უზრუნველყოფა; საკრებულოსათვის დასკვნების წარდგენა კომისიის კომპეტენციას მიკუთვნებული სამართლებრივი აქტების პროექტებთან დაკავშირებით; ქალაქ ქუთაისის მუნიციპალიტეტის მერიის შესაბამისი სამსახურების მონიტორინგი და ანგარიშგება (მათ მიერ ცალკეული პროგრამების განხორციელების მიმართულებით); სამართლებრივი აქტის პროექტების მომზადება და საკრებულოსათვის წარდგენა; ძირითადი პრობლემატური საკითხების შესწავლა-გაანალიზება შემდგომი რეაგირებისათვის, საჭიროების შემთხვევაში საკრებულოს სხდომაზე განხილვის მიზნით; 2024 წლის ბიუჯეტის საორიენტაციო პარამეტრების შემუშავებაში მაქსიმალური ჩართულობა; მჭიდრო თანამშრომლობა და აქტიური სამუშაოების წარმართვა „USAID-ის“ პროგრამასთან დოკუმენტის: „ქალაქ ქუთაისის მუნიციპალიტეტის საკრებულოს საფინანსო – საბიუჯეტო კომისიის სტრატეგია და სამოქმედო გეგმა 2023-2025“ ფორმირებასთან და მის შემდგომ რეალიზაციასთან დაკავშირებით; ფიზიკურ და იურიდიულ პირთა განცხადებების განხილვა, მათზე სათანადო რეაგირება.

**შენიშვნა:** წინამდებარე ანგარიში, 2023 წლის 26 ივლისს, ქალაქ ქუთაისის მუნიციპალიტეტის საკრებულოს 21-ე სხდომაზე წარმოდგენილ იქნა ქალაქ ქუთაისის მუნიციპალიტეტის საკრებულოს საფინანსო-საბიუჯეტო კომისიის თავმჯდომარის, ბაქარ მახარაძის მიერ.

საკრებულოს თავმჯდომარე

ირაკლი შენგელია

